



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 8



NIA Court-i MLA Akhil Gogoi nem temelaba agütsür



Russia nunger kaket reju nung tanur tenet khaset

VOL. XVIII NO. 207 (ADOK 207) DIMAPUR

RASEMNÜ (WEDNESDAY)

MONUPII (MAY) 12, 2021

₹ 5.00

Nagaland nung May 14 nungi 'total lockdown' tenzüksü

Kohima, May 11, 2021 (TYO): Nagaland nung COVID-19 kanga putetba nung ajemdaker state sorkari May 14 nungi hopta ka 'total lockdown' asütsü telemtetba agiogo.

"Mongulbarnü High Powered Committee (HPC) on COVID-19-i May 14 aonung 6:00 ako nungi May 21 tashi state ajunga 'total lockdown' asütsü lemetet" ta Government spokesperson on COVID-19 aser Minister Neiba Kronu-i metetdaksü.

Chief Minister Neiphiu Rio menden ser HPC senden nung iba telemtetba agi, ta paisa ashi.

May 3, 2021 nü Nagaland sorkari Kohima aser Dimapur nung tesem kar containment zones kümdaksüba osang metetdakja liasü. May 5 aonung 7:00 ako nungi anogo tenetnü atema iba tetuyuba agütsü.

Yamaji süaka, Nagaland nung nisung aika dak COVID-19 aliba puteta arur aser anogo pungu tsüingda nisung 1,279 dak putetogo.

May 5, 2021 tashi nung Nagaland nung nisung 15,004 dak puteta liasü aser 2,038 anepaluya liasü, saka May

10, 2021 tashi nung COVID-19 puteter ajak agi 16,283 kümogo aser nisung 2,884 anepaludar.

Anogo pungu tsüingda Covid-19 agi shiranger nisung 32 asü aser parnok züingsema tasür ajak agi 150 kümogo.

"Covid-19 menatepba aziüoktsü atema HPC-i hopta ka total lockdown asütsü telemtetba agi" ta Minister Kronu-i ashi.

Tang tenokdangba agüja alibatem magientsü aser ano SOPs tasen kar metetdaksütsü, ta paisa ashi.

"Ajisüaka, total lockdown mapang agricultural activities dena essential services menokdangtsü aser Head of Department temi tetetba core team ajanga sorkar department tem ketdangtsüa aotsü" ta Minister Kronu-isa metetdaksü.

Construction maparen inyaksü melatsü saka contractors mesüra firms-i mapa inyaker ajak SOPs benshidaksütsü, ta paisa shisem.

"Nagaland nung total lockdown mapang Health & Family Welfare department-i Covid-19 sample bendena tendangtsü," ta Kronu-isa ashi.

Dimapur nung Mahindra office & SBI shibangtsür

Dimapur, May 11, 2021 (TYO): Dimapur kübok 6th mile, Sovima Village gate Chumukedima anasa Mahindra Truck & Bus Division office Chabou & Co aser State Bank of India (SBI) main branch (72) ghonda 48 atema shibangtsür, ta Dimapur DC aser DDMA Chairman, Rajesh

Soundararajan-i metetdaksüogo.

Tenokdangba agütsüba mapang tsüingda tesem ajunga merüktetsü. Iba tetuyuba alema inyaker tem Disaster Management Act, 2005 aser IPC nung arla balala kübok temerenshi alitsü, ta DC Rajesh Soundararajan-isa ashi.

Health Workers atema Insurance scheme tenzüksür

Dimapur, May 11, 2021 (TYO): India sorkari COVID-19 anema inyakba Health Workers atema Insurance scheme tenzüksühiogo aser iba nung Nagaland sorkaria Rs 10 lakh talila agütsüsemtsü ta tanü metetdaksüogo.

Iba scheme ya COVID-19 agi shirangertem anepaluba Health Worker tem atema lir.

April 24, 2021 nungi tenzükür anogo 180 atema Pradhan Mantri Garib Kalyan Package kübok Insurance scheme tenzükür lir, ta Nagaland Chief Secretary, J Alam-

i tanü sangdong ka nung metetdaksüogo.

Iba Insurance scheme ajanga Government Hospital, Health Care Centre aser Private Hospital tem nung Health Workers nem insurance teyari agütsür. Health Worker temi COVID-19 agi shirangertem anepaludang lendong kar danga ajurura Rs. 50 lakh tashi teyari agütsütsü.

Iba scheme kübok adenba health worker nem Nagaland sorkaria Rs. 10 lakh talila agütsüsemtsü, ta Chief Secretary, J Alam-isa metetdaksü.

COVID-19: Gauhati HC-i NE state 4 dang tuyur

Guwahati, May 11, 2021 (Agencies): Gauhati High Court-i Assam, Nagaland, Mizoram aser Arunachal Pradesh nung High Court tem nem June 1 tashi maparen inyaksü tetuyubatem agütsüogo.

COVID-19 tensa aser tenokdangbatem ajanga lawyers aser ken o benokertem okadaki mauruteter, ta Gauhati High Court-i ashi.

Iba nung ajemdaker Deobarnü Chief Justice Sudhanshu Dhulia aser Justice N Kotiswar Singh o Justice Manash Ranjan Pathak nunger suo motu PIL ka benok aser Hombarnü tetuyubatem agütsü. "Assam aser Nagaland, Mizoram o Arunachal Pradesh nung COVID-19 kanga puteter aser iba jagi Chief Justice-i iba ama tensa ka nung ken

o benokertem yaritsü atema Full Bench suo motu tetetogo" ta Gauhati High Court-i sangdong ka nung metetdaksü.

"Iba Court aser iba kübok Courts o Tribunals-i April 19, 2021 tashi tetuyuba agüja alibatem ajak June 1, 2021 tashi mapang atsülangtsür. Iba nung Outlying Benches aser Courts aser Tribunals ajak adener" ta sangdong nungsa ashi.

Tai tonglokja alir mesüra aija alir ka nem April 19, 2021 nungi June 1, 2021 tashi interim bail, short term bail mesüra anticipatory bail agüja lira, ibaji May 31, 2021 tashi atsülangtsür, ta Gauhati High Court-isa metetdaksü.

Iba ken o ya May 31 nü full bench-i angadangtsü.

Kohima: Random test nung 50% tema dak Covid putet



May 10, 2021 nü Kohima District Task Force (DTF) senden amenba noksa nung angur. (DPRO Kohima)

Dimapur, May 11, 2021 (TYO): May 10, 2021 nü Kohima District Task Force (DTF) senden amendang containment mapang inyakba osang metetpela liasü.

"Testüba anogo ishika Kohima Municipal Area kübok tesem balala nung nisung mashii dak Covid tendangdang 50% tema dak aliba putetogo," ta Kohima Chief Medical Officer, Dr. Vezokholu Theyo-i senden nung ashi.

"Tang tashi nisung 872 dak putetogo aser Covid wara tanabuba nung shirangba yimya alir timba puteter" ta Dr. Vezokholu-isa ashi.

Kohima Village Council aser AKMWP-i Kohima district

ajunga total lockdown asütsü shidangba onük benoka lemsatet aser idangji senden nung adenba MLA temia virus menatepba aziüoktsü atema total lockdown nungdaker ta tebilembatem lemsateta liasü.

Kohima urban area nung sample mashii bendena tendangdang 50% den timba dak COVID-19 aliba putetogo aser ibaama tensa ka nung yimdak nungi arurtemia virus menar pei pei yimi bener oa prokshitsü akok ta senden nung adenertemisa ashi.

Senden nung AKMWP aser AYO ketdangpurtemi virus menatepba aziüoktsü atema total lockdown asütsü nungdak ta tebilemba lemsatet.

Onük ajak angadangba sülen Kohima DTF-i High Power Committee dang tebilembatem abentsü telemtetba agi.

Senden nung Kohima Deputy Commissioner, Gregory Thejawelie NCS den Minister-in-charge for Kohima, PWD Housing & Mechanical Minister, Tongpang Ozukum na menden liasü aser Urban Development & Municipal Affairs Advisor, Dr. Neikiesalie Kire o Technical Education & Election Advisor, Medo Yhokha naprong aden.

Iba senden nungsa All Kohima Municipal Wards Panchayats (AKMWP), Angami Youth Organisation (AYO), Kohima Village Youth Organisation aser tanga züingsemtem aden.

COVID-19 Nagaland: Nisung 269 dak putet; 6 asü

Kohima, May 11, 2021 (TYO): Mongulbarnü Nagaland nung nisung 269 dak COVID-19 aliba putet aser parnok züingsema nisung ajak agi 16,552 kümogo. Maneni, tanü COVID-19 puteta alir nisung 6 asüba züingsema tasür ajak agi 156 kümogo.

"Tanü nisung 269 dak COVID-19 putet. Parnokji Dimapur nung 207, Kohima nung 40, Tuensang nung 8, Mokokchung o Mon nung pezüzü (4), Phek nung 3 aser Longleng, Zunheboto o Peren nung kaka (1) lir" ta Health & Family Welfare Minister, S Pangnyu Phom-i metetdaksü.

Nisung 16,552 rongnungi 12,779 taneptsü nguogo aser tang nisung 3,081 anepaludar. Nagaland nung COVID-19 nungi

taneptsü angur 77.2% dang kümogo, ta paisa shi.

"Tang anepalurtem rongnung nisung 146 dak shirangba yimya terara lir, 94 shiranga oxygen agidar, 24 kanga mejungi oxygen agir, ICU nung 4 aser ventilator nung 10 anepaludar" ta State Nodal Officer, Dr Nyanthung Kikon-i metetdaksü.

Dimapur district nung COVID-19 puteta alir nisung 6 asüba züingsema tasür ajak agi 156 kümogo saka nisung 11 bo tanga tashidak ajanga asü, ta paisa ashi.

Nagaland nung COVID-19 puteter nisung 536 tashi tanga state temi ogo, ta paisa shisem.

"Tang tashi nung Nagaland nung COVID-19 alitsü akok ta temolung melemba sample 1,66,895 tendangogo. RT-PCR

ajanga 82,090, TrueNat ajanga 50,732 aser Rapid Antigen Test ajanga tendang," ta Dr Kikon-isa metetdaksü.

"Hombarnü tashi nung Nagaland nung nisung 1,79,767 nem COVID-19 vaccine indang dose 2,29,704 agütsüogo" ta State Immunization Officer Dr Ritu Thurr-i metetdaksü.

Vaccine agirtem rongnung frontline workers 51,925, healthcare workers 15,015 aser arishi küm 45 ser tempur 1,12,827 lir, ta pai ashi.

"Vaccine agirtem rongnung nisung 49,937-i dose anaprong agiogo. Parnokji front-line workers 27,072, healthcare workers 10,016 aser arishi küm 45 ser tempur 12,849 lir" ta Dr Thurr-isa metetdaksü.

Assam nung lockdown malitsü: Health Minister Keshav Mahanta

Guwahati, May 11, 2021 (Agencies): Assam nung lockdown alitsü tebilemba mali ta Health Minister tasen Keshav Mahanta-i Mongulbar aonung metetdaksüogo.

Taonung Assam Cabinet mezüingbuba senden amenba sülen Keshav Mahanta-i iba osang sangoktsü.

State sorkar aser administration-i Assam nung COVID-19 tensa aziüoktsü atema inyakyim akangshitsü. Tang

curfew mapang agüja aliba dang nungi talila akümtsü, ta paisa ashi.

"Taoba mapang SOP agütsüba nung dokan aser shishilembadak nikongdang 2:00 ako tashi nung shibangtsü tuyua lir, saka ibaji nikongdang 1:00 tashi dang asütsü akok. Iba atema onoki jembitepdar" ta Health Minister Mahanta-isa ashi.

Bodbarnep 10:30 ako tashi nung Assam State Chief Secretary Jishnu Baruah aser Assam DGP Bhaskar Jyoti Mahanta nati SOPs tasen

metetdaksütsü ta paisa shisem.

"Assam Cabinet Bodbar shia senden amentsü aser taruba senden nung COVID-19 indang economic package atema jembitsü" ta Minister Mahanta-isa metetdaksü.

Hombarnü Assam nung Covid agi shiranger nisung 77 tashi asü aser nisung 5,803 dak putet.

Yashi tashi nung Assam nung COVID-19 puteter ajak agi nisung lakh 2.98 lir aser tang parnok 37,500 anepaludar.

Longleng District Planning & Development Board senden menogo



Dimapur, Monupii/May 11 (TYO): Longleng District Planning and Development Board pur May 2021 atema senden ya Deputy Commissioner Office Complex nung May 6, 2021 nü Deputy Commissioner & Vice chairmen DPDB, Longleng lenisüba kübok mena liasü.

Medical Superintendent, Longleng mapa yutsür aosang, Dr. L. Belho-i COVID-19 den raraba nung anibelem mesasai nokdakba atema DPDB & DTF mendenpubai pelaba lemsatep aser pa mapa tasenba atema moaja liasü.

DPO, LRD Longleng, Kughalu Chishi ajanga Longleng district nung coffee adokba indang onük nung jembu aser senden nung dena alirtem nem coffee jemdakja liasü.

Senden nung mendenpubai taoba ita senden amendang lemtetba nung ajemdaker maparen balala inyakba indang osang agütsü aser DPDB Hall, Longleng yanglutsü atema pa-

sasa bushi aser district nungi MLA ana ajurua liasü.

Iba senden nung nija kaketreju tem temaba jenjanga ajungkettsü aser teyari agütsütsü indang onük süoka jembu. Blooming Buds School, Longleng ya Class 9 aser 10 tashi phase lemsar upgrade asütsü aser St. Thomas School, Tamlu nem Grant in Aid agütsütsü atema iba senden nung onük benoka jembu aser kuli tabensa aser tejangja ngua nungdakba meratem agütsü lemteta liasü.

Maneni iba senden nung District level Committee on Sakshi Aspirational Block onüka benoka jembu liasü.

Senden nung Longleng district kübok Sakshi aspirational block atema district level committee ka shimteta liasü. Iba committee nung züngsemtem yamai shim:

1. Deputy Commissioner-Chairman
2. District Planning Officer - Member Secretary

3. EAC Sakshi- Member
4. BDO Sakshi - Member
5. Chief Medical Officer- Member
6. DEO/SDEO Education - Member
7. EE, PHED -Member
8. EE, PWD (R&B) - Member
9. SDO Power - Member
10. Agri & Allied Department - Member

Maneni senden nung society registration indang onük benoka liasü aser Society Registration Act kübok Aloktepla Welfare Society, Yachem aser Eastern Care Society, Longleng ya register asütsü agizüka ayu.

Maneni iba senden nung züngsem tasentem, SDO (C), Yanthongbemo; Medical Superintendent, Kibangkumba; SDO (Power) Er. Moichung Shembu Phom aser CDPO Tamlu, Manpong Phom nungertem metetpelaba mapang agia liasü.

KVYO ajanga frontline worker nem akum agütsür

Kohima, Monupii/May 11 (TYO): Kohima Village Youth Organization (KVYO) ajanga frontline worker ajunga den pelaba lemsateper, ta sangdong ka ajanga ashi.

Frontline workers-police, traffic police, doctor, nurses aser medical staff, ambulance aser nisung tasümgang abenba gari anirtem aser yaritepertem, district administration, tongtipang osettsüset abenertem aser dokan kiburtem shirnoki asenok ajak atema par

taküm bendanga agütsür talitabong inyaker ajak dang pelaba lemsateper, ta ashi.

Nisung meimchir takum kumzükba wadang nung shingaiia nenok memelentettsü. Nenok ajaki züngdangtsü makokba tenla agüja nü takum timtemi aitsü metsümbui tenzükba atema onoki akum agütsür, ta KVYO tir, Ruokuoneituo Phewhuo aser tongti zülur Neingusalie Khruomo nati ashi.

Maneni High Powered

Committee ajanga District Task Force Kohima aser Dimapur den shisa lemsatepa mapang shidak nung iba tesem ana Containment Zone ta sangdongtsü telemtetba agiba atema KVYO ajanga pela agizüker, ta ashi.

Yimtsüng aser temeket nung Containment Zone benokba nung Kohima Village-ia nungita yaritepogo aser ajak dang SOP sülen kanga junga anidaksü ayongzük, ta KVYO ajangasa ashi.



Kiphire district nung COVID-19 cases tali akumba mechi District Task Force on COVID-19 puri anogo asem tashi dokan kibur ajak indang sample agizüka tendangtsü lemtet. May 11, 2021 nü sample 151 tendangba nungi nisung pezü dak COVID-19 positive jangjateta tang district nung iba virus agi menepa alir nisung 17 jungogo. District Administration, Medical Team, Police aser Chamber of Commerce, Kiphire nungertem lia tendanga liasü.

COVID-19 tashidak wara atema nübu talila bendenloker

Dimapur, Monupii/May 11 (TYO): COVID-19 tashidak wara aziüoktsü atema training agir aliba nübu tali nungdakba mechi, COVID-19 tashidak wara tajungtiba nung ketdangtsütsü atema nübu anitettsü asoshi totuyuba kar agütsüo:

1. GNM mesüra B.Sc. (Nursing) aser Allied Health Care professional course agiba kaketshirtem shirnok internship agir mesüra Final Exam ataa aliba Final Year nung alirtem nem Senior Faculty ka tawapangba kübok Government/Private facilities nung full time Non-Covid essential services duty agütsütsüla. Non-COVID essential services duty temelener aruba sülen yangji inyaka aliba medical staff tem ya COVID-19 duty lemezüktsütsü.
2. ANM course agiba kaketshirtem shirnok tang Intern tagidak lir mesüra shirnok Final Year nung Final Exam ataa lir, parnok nem Senior Faculty kübok Government/Private facilities nung full time Covid Vaccination Nursing duty agütsütsü. Non-COVID essential services duty temelener aruba sülen yangji inyaka aliba medical staff tem ya COVID-19 duty lemezüktsütsü.
3. GNM mesüra B.Sc. (Nursing), ANM aser Allied Health Care professional course agiba kaketshirtem

shirnok 2nd Year nung lir, parnok ya clinical documentation aser danga ancillary service nung amshitsü saka clinical care aser service kecha nunga mapa magütsütsü.

4. Maneni danga nung Medical Professions azünger Interns mesüra Final Year Student tem kar danga tang State nung lira, parnokia iba maparen atema apply asütsüla.
5. Tekalen shia aliba Health professional tem nübu amshiba atema State Government ajanga mela aliba ama taa talang agütsütsü.
6. COVID-19 den raraba health worker tem Sorkar indang Insurance Scheme küboki aita daksüba ama tekalen shia aliba Health professional tem ya aita daksütsü.
7. Professional shirnoki tajemba agi Covid duty anogo 100 atema züngzükteper takok ngua inyakdir, parnok nem Government of India nungi Prime Minister's Distinguished Covid National Service Samman aser State Government ajanga mapang shia teyari agütsüba angutsü langa lir.
8. Covid dak sendakba nung yariteptsü atema nübu agütsüba medical professional nem mozüki ketdangtsürtemi tapet mozü agütsütsüla.

Tuensang nung lokti adenshiba nokdang: DC

Dimapur, Monupii/May 11 (TYO): District nung tang tesüsa COVID-19 cases tali akumba mechi aser May 10, 2021 nü District Task Force for COVID-19 senden nung lemtetba ama, Deputy Commissioner & Chairman, District Task Force for COVID-19, Tuensang, Kumar Ramnikant, IAS ajanga totuyuba kar agütsüo.

Sangdong ajanga ashiba agi, District Task Force, Tuensang nungi temelaba magi loktiliba/

yimten/tamangba yimsü/sobaliba/saisapong amala nung sendakba lokti kecha adenshitsu memelar.

District telungzük nung saisapong densema Public ground/Playground ajunga nung lokti adenshiba ajunga nokdang, ta ashi.

Iba totuyuba ya tang nungi tenzük tarutsü nung totuyuba tasen ka magütsü tashi amshia alitsü, ta sangdong ajangasa ashi.

Mon aser Naginimora nung ki kar shibangtsür

Dimapur, Monupii/May 11 (TYO): COVID-19 tashidak prokshia aoba nokdangtsü atema mera tajungtiba nung agütsü mechi Mon Town nung Techahan Ward kübok House No. 94 aser SBI Office, Mon Town anasa Thamnan Ward nung House No. 55 shibangja atar, ta Deputy Commissioner, Mon, Thavaseelan K, IAS ajanga sangdong ka nung metetdaksü.

Iba sangdong nung aibelener nisung kar danga lira, Disaster Management Act 2005 indang Section 51 nungi 60 den Indian Penal Code indang Section 188 kübok tapet temerenshi agütsütsü, ta Deputy

Commissioner ajangasa metetdaksü.

Naginimora nunga COVID-19 tashidak wara prokshia aoba nungi nokdangtsü atema mera balala agütsü mechi Chingjang Colony, Ward No. 04, Naginimora nung House No. 138 shibangja atar, ta Additional Deputy Commissioner, Naginimora, Vineet Kumar, IAS ajanga May 10, 2021 nü sangdong ka nung metetdaksü.

Iba totuyuba kübok aibelener nem Disaster Management Act 2005 kübok Section 51 nungi 60 aser Indian Penal Code indang Section 188 kübok mela aliba ama merenshitsu, ta sangdong ajanga ashi.

ZPM Iennir Lalduhoma-i MLA tezüngzüktep agiogo



Aizawl, May 11, 2021 (Agencies): Zoram People's Movement (ZPM) Iennir Lalduhoma-i Mizoram Assembly nung MLA ama tezüngzüktep agiogo.

Mongulbarnü Assembly annexe building nung Assembly speaker Lalrinliana Sailo-i Lalduhoma nem tezüngzüktep agidaksü. Iba sentong ya COVID-19 inyakyim ama ayonga agi.

Sentong nung Home

minister Lalchamlia, school education minister Lalchhandama Ralte, Congress legislature party leader Zodintluanga Ralte aser Mizo National Front (MNF), Congress, BJP MLA tem aser independent MLA asem aden.

Züngsem 40 agi akümba Mizoram Assembly nung MNF MLA 27, Congress MLA 5, BJP o ZPM MLA kaka aser independent MLA 6 lir.

Lalduhoma-i November

2018 election nung Serchhip assembly menden nungi takok angu saka November 2020 nung Speaker-i anti-defection law kübok anentsü.

Iba ajanga April 17, 2021 nü Serchhip assembly by-election agia liasü.

2017 küm ZPM tentetba sülen Lalduhoma-i mezüngbuba MLA aküm aser July, 2019 nung Election Commission of India (ECI) nungi party registration angu.

Tripura nung taoba CM Manik Sarkar'er convoy amak

Agartala, May 11, 2021 (Agencies): Hombarnü South Tripura district kübok Shanti Bazaar nung taoba Tripura Chief Minister Manik Sarkar indang convoy amak.

BJP züngsemtemi Manik Sarkar'er convoy amak ta CPI-M-ibo tai tongloksüogo.

Iba mapang Sarkar den deputy opposition leader Badal Choudhury, MLA Sudhan Das, aser taoba MP Narayan Kar nungertem liasü.

Sarkar tonga marudang Shanti Bazaar tesem nung tetsürtem dena BJP pusemer aika adenshia liasü ta CPI-M-i ashir.

Manik Sarkar iba tesem tonga arudang telok jagi taoba Tripura Chief Minister dang o tamajung ashi aser lung o bottle agi aon ta parnokisa tai tongloksü.

"Sorkar tetuyuba kübok nisungtemi amakba ta magizüker" ta Manik Sarkar-ia ashi.

"Onok amakba yimyaji tasa jelia renemer inyakba ama liasü. BJP tongti Iennirtemi tetuyuba agütsür inyakba ama lir" ta paisa ashi.

Ajisüaka, Tripura Law Minister aser BJP Iennir tejen Ratan Lal Nath-ibo CPI-M-i tai tongloksüba magizükba metetdaksüogo.

Assam Cabinet Minister temi mapa lezmükogo

Guwahati, May 11, 2021 (Agencies): Mongulbarnü Assam nung Chief Minister Himanta Biswa Sarma-i anir Cabinet Minister temi mapa lezmükogo.

Sarma-i Home, Personnel, PWD (Public Works Department) ketdangsüsü saka taoba sorkar mapang pai ketdangsüa inyakba Health & Family Welfare, Finance aser Education department tembo tanga Minister tem nem lema agütsüogo.

AGP Iennir aser Cabinet Minister Keshab Mahanta nem Health & Family Welfare Department den Science & Technology aser Information Technology Department tem lezmüksü.

Taoba Congress sorkar mapang Minister inyaker Ajanta Neog nem Finance aser Social Welfare Department tem lezmüksüogo.

Ajanta Neog ya Assam nung mezüngbuba tetsür Finance minister asüsü saka la nem iba mapa lezmüksüba atema nisungtem aoksar kechiyong taoba mapang lai Finance ama tongtipang department ketdang mesüdang.

Dhemaji MLA aser Cabinet Minister Ranuj Pegu nem

Education aser Welfare of the plain tribe and backward classes (non-BTC) department tem lezmüksü.

Külen, AGP president aser Cabinet Minister Atul Bora nem maneni Agriculture, Horticulture, Animal Husbandry & Veterinary Department tem lezmüksüogo. Taoba sorkar nung pai kasa Department tem ketdangsüa liasü. Bora nemsä Border Area Development, implementation of Assam Accord aser Cooperation Department tem mapa lezmüksüogo.

Taoba Cabinet minister Parimal Suklabaidya nem maneni Environment & Forests, Fisheries aser Excise Department tem, taoba Cabinet Minister Chandra Mohan Patowary-i Transport, Industries & Commerce aser Skill Development Department tem tanaben lezmükogo.

State BJP president aser Cabinet Minister Ranjeet Kumar Dass nem Panchayat & Rural Development, Public Health Engineering, Food & Civil Supplies aser Consumer Affairs Department tem, UPPL Iennir aser Cabinet Minister Urkhao Gwra Brahma nem Handloom & Textiles, Soil Conservation,

Welfare of Plain Tribe & Backward classes (BTC) department tem lezmüksüogo.

Taoba Minister of State (health) Pijush Hazarika nem tan sorkar nung Cabinet menden agütsüogo aser pa nem Water Resources, Information & Public Relations aser Parliamentary Affairs Department tem lezmüksüogo.

Taoba minister Sanjay Kishan nem Welfare of Tea Tribes, Labour & Employment Department tem aser ano taoba minister Jogen Mohan nem Revenue & Disaster Management, Hills Area Development, Mines & Minerals lezmüksüogo.

Dhekiajuli MLA Ashok Singhal nem Guwahati Development, Urban Development & Irrigation Department tem aser Tingkhong MLA Bimal Bora nem Sports & Youth Welfare, Cultural Affairs, Power aser Tourism Department tem lezmüksü.

Hombarnü Guwahati nung aliba Sarusajai Sports Complex nung Himanta Biswa Sarma-i anir council of minister züngsem 13-i Assam Governor Jagdish Mukhi tsüngdang tezüngzüktep agia liasü.

NIA Court-i MLA Akhil Gogoi nem temelaba agütsür



Guwahati, May 11, 2021 (Agencies): Sivasagar MLA Akhil Gogoi-i Assam Assembly nung MLA ka ama tezüngzüktep agitsü atema Special NIA Court-i temelaba agütsüogo.

Mongulbarnü Special NIA Court-i Sivasagar MLA Akhil Gogoi nem temelabaji agütsü. Pai Assam Assembly nung security teperi lia tezüngzüktep

agitsü. Assam nung Citizenship Amendment Act anea lungkak aitba mapang tai tonglokja Akhil Gogoi ya December 2019 nung tepuokdak lir.

Taküm Assam Assembly election nung Akhil-i Sivasagar LAC nungi takok angu. Pai BJP candidate Surabhi Rajkonwari madak votes 11000-i takok ngua liasü.

Delhi nung Mizoram House Covid Care Unit aküm



Aizawl, May 11, 2021 (Agencies): Mizoram chief minister Zoramthanga-i ketdangsüa Delhi kübok Vasant Vihar tesem nung aliba Mizoram House nung Covid Care Unit yanglu.

"Linük yimtiba nung aliba sensotem atema kanga bilemetsür. Wara tanabuba nung Delhi ya COVID-19 hotspot ka kümogo," ta

Zoramthanga-i taoba mapang metetdaksüogo.

Vasant Vihar nung aliba Mizoram house kobi melii Mizo nunger atema Covid Care unit kümdaksütsü ta paisa taoba ita metetdakja liasü.

Delhi nung aliba Mizoram nunger doctor aser nurse tem dang shirangertem anepalutsü mepishir, ta CM Zoramthanga-isa ashi.



Arunachal Pradesh kübok Changlang district nung May 9, 2021 nü sepaitemi NSCN (IM) züngsem ka aser OGW ka apu. Osang tejangja ka angazükba sülen sepaitemi Therimkan tesem mita aodang tena apu aser tena ket nungi 9mm Pistol ka, 9mm Pistol round 3, AK ammunition rounds 3, Chinese Hand Grenade 1 aser taitü aketba kulikakettem apu. Sepaitemi NSCN (IM) züngsem aser OGW naprong Nampong Police Station, Changlang District ket nung agütsüogo.



TIR YIMYIM YIMOBILEM (EDITORIAL)

DIMAPUR RASEMNÜ, MONUPII (MAY) 12, 2021

Chiyongtsü talila alioka meyuli

Asen lima nunga Corona virus tashidak wara ayimsünga moudaktsüi nokdangtsü atema ano asüng ser yanü aonung nungi hopta ka nisung shinga kechalenia moudaktsüi mokdanga ayutsü asoshi government-i telemetba agiogo. Ibai asenok asoshi osang tajungbo masü saka asenok ajak taküm kümzüksü asoshi lemteba telemetba asünungji, asenok ajaki tashi angaa ano hopta ka aremzüka kechalenia moi kidang amongtsü renemtsüla. Atangji, hopta ka kidang amongtsü renemtsübajia khuret tulu, kechiyong mapai maoyonga chibosa chiyongtsü, anungji mapa meinyak ser chiyonga amongtsübaji kibong khuret abener atemabo shisabolutsüka lir. Atangji, takar asoshibo mapa meinyaki amongbaji takoksabo takoksa saka kecha balaka shisabolu khuret tulukabo masütsü, ajüsüka sensaker, ano talisa anogo shia ayangba sen agi kibong mesürtem asoshibo kanga khuret tulu lir. Anungji, kibong shia hopta ka mapa meinyak chiyonga amongtsü asoshi renemding, kibong shia pei yari lalushipong mesüi, akhidang dang nungibo senotsü ishinba endoktsüsa sentong renemtsübaji kanga tongtibang asütsü. Aji oda, hopta ka dokan melapoktsüji ta bilema sen akayonga, makayonga kidang asen nungdakba dang nungi talila alioka ayutsü kecha nungdak madoker, kechiyong ibai injang bomb amshia tsükchirtem den raraba tongpang ka masü saka tashidak mesen den raraba tongpang lir, anungji nübertem nungdakbo mapang shitak nung angutsüsa mapang apir government-i shishilembadak lapoktsütsü. Kena shisa akartem asoshibo, lockdown aliba mapang ya, mapa temerang inyaker masüji, kidang achiajem nung senotsü ajema endokba mapang ka asütsü. Asenoki aiben shisamaka dang masü awashi memetet ka inyakba ajanga asenoksasa asenok akoksatsüsa inyakba mapa kaji, joko hopta ka kechalenia moutettsü aser kecha mangutsüji ta bilema hopta ka masü saka ita piyong chiyonga jema amongtsü amai menungdakbatem dena aika alia ayur. Iba jagi mapa inyaka chiajema amongba mapang dang nungi mapa meinyaki chiajema amongba mapangang senotsü teimba endoker aser ano takartemi pei nungdakba dang nungi talila alidena aoba agi shishilembadak tayokertemi jenjang atur aser sensakertema akoksadaktsür. Tang ama tashidak wara nokdangtsü atema shinga kechalenia moudaktsüi kidang mongdaktsüba ya benjong amai pelatepa chiajema amongtsüba mapang masü saka shitakba agibo chiamajem lumia sarasadema amongtsüba mapang lir. Aji oda, iba ama mapang ya takartemi sensakertem timatemtsüsa pei asoshi chiyongtsü kecha talila alioka mayutsüla aser kokra sensakertem den pei akaba agi tera agi asüyonga lemsatepsüla. Ano, jangotsü ayokertem rongnunga karbo nisung dang mememi senotsü tajangzük dang bushiba shishilembartema lir. Item jagibo tang ama nisungtem timatemding, pei dokan nungi jangotsü jenjang dalangba agi ayoktsü bilemer masü saka jenjang tur ayoktsü atema jangotsü miima yur maka kumdaktsür. Item ama shishirtemjiyo yimten aser loktii bushia tapet temerenshi agütsütsü junger. Asenoki angatetsüba kaji, ibai ayawara masü, anungji asen lima nunga jangotsü peria dang lir aser Tsüngremi dang anü aser tsünglu mapang shitak nung yokra, aluyimertemi alu shitak yimtettsü. Ita junga mokdanga ayuyonga alu ayimtsübo melaa lir aser anogo shia ta masüyonga hopta nung anogo ananü mesüra asemnükabo nübertem pei nungdak alitsü asoshi shishilembadak lapoktsütsü, anungji asenoki kecha mangu aya agi timatemtsü amaibo mebilemstüla. Tang ama mapang tamajung nung ya, asenok aika tashidak wara agi masü saka peisasa talila bilemloka shisaboluba agi tashidak kümer timatemer, anungji akok tashi tang ama mapangba nung ya kangabo shisamebului pei akaba yari chia ajemtsü aser tensa den apet mapa apiteta inyaka alitsü merangtsüla. Aji oda, asenok akümüli tepiyong kenüa anisüngzüka kidang memongdang, mapa – mapa dang arishia lia aruba to, tangang anisüngzüksü mapang tajung ka angur ta bilema kinungertem den pelatepa kidang amongtsüba indanga bilemstüla. Asenok kidang kibong nung kinunger külemi alitsüba mapang ya bilemdangra asen arishi dang nungi tatsüba lir. Talisa tanü putu nung kidang tsürabur o tanurtem na külemi aliba anogotem züngdangra teimba agi küm 20 shi dang külemi litettsü. Ano, tanur asügangyongi tangaleni tazüngi yoker atemabo tanurtem den külemi aliba anogoji züngdangteta ka dang asütsü, kechiyong tanurtem kidang nung pilaa tazüngi yokbaji joko tepila akümer, parnokji züngtemerbo kibong kümer ki balaka nung alitsü. Item ajakji asadanga tsürabur aser tanurtem ajaki tang ama lockdown mapang ya kinunger külemi longjema amongba mapang ka ajurur ama bilema mongra, Covid mapang ya temoatsü mapangang ka asütsü. Asenok taküm alitsü aser asütsüba yabo Tsüngrem ket nung dang lir, anungji asütsüba ya kangabo metsübuli aser ano Tsüngremer mapang matong dang asütsüsa mashimashia melili.

OLEMSABANG

Tanü Ao oshi merenlokba tera

~ Esther (www.Nokinketer.com)

(Yashi adok nungi...)

Saka tanü talisa jila balala nung aliba tsürabur aikati iba shilem junga magiteti pei jala jabasotem den tezüpaba apia, mesüra karibo oda pei tanur jaki tangar oshi jembitetbaji tiyaksanga dang bilema iba tangatetba nung pei jala jabasotem den Nagamese, English, aser yamala tanga oshitem dang jembia kibong nung yimsü asüba ajanga chirnurtem pei oshi mashitsüsa kümadokba tanü kibong aika nung ajurudaki.

Kodang asenoki Ao oshi merenlokbaji kibong telung dak alaka oa reprangdangdir, Private School-jibo toktsür Govt. School-a aika nung Ao oshi magitetsüsa timtem ajuruba angur. Anungji iba tia tensa ka nung asen oshi angazüksü aser renlokdaktsütsübaji Aor loktiliba senden balala nung atongsema ajanga dang tali angazüktettsü ta tanü mapang tensa jagi sayur, saka kodang asenoki khen kanga aroka shisadanga reprangdangdir, talisa jila (Town/City) balala nung aliba tsüraburtemi pei jala jabaso anebalua yimer shisashir lokti senden mesüra Ao Kaketshir lokti senden balala nung ajungshia shilem agia dendaktsütsü tangatetba agi kanga dang anünga lir aser tsüraburtem aikati iba tia aroka meshisadanger. Kechiaser Aor loktiliba balala nung atongsema shilem agiba ajanga dang sobaliba, wainshin aser Ao oshi ajakji angazüka renlokdaktsür.

Ano tongtibang kaji tsüraburtemi pei chirnur anir tekülem/sentepsenji balala nung meranga atentsüla sünung yangjia azülaa dang aor. Akhi asen limai missionary-tem arudang Tsüngrem O den külemi Ao oshi zülua sayua angazükdaktsüba ama tanü putu nung joko anarongdena Tsüngrem O den külemi Ao oshi jembia angazükdakji Sunday School-ji dang lir ta angateter. Ajita süaka tsürabur aikati Deobar anepdang pei tanurtem anebalua Sunday school-i anioktsütsü mesüra ajungshia yoktsübajia tsüraburtem asoshi kanga tasak ama, shilem agir kanga ajema kümogo.

Asenoki kodang tanü tendak tsüraburtem dak kanga junga rangloka bushidangdir parnok dak tajitetsü aika adoker, talisa jila balala nung alir tsüraburtem (kijung lanutsür mesüra kijung lanurtem) pei oshi (Ao oshi) junga mashiba purtem aika dang angur, süra parnoki koda pei chirnur Ao oshi nung tera yanga anitetsü ta asüba tasüngdangba jenti bener arutsür! Item ajakji akhi mapang par tsürabur tashi maitba tanü jungkai adoker asütsü.

Akhi asen otsüla-oboula nunger putu ji meyipa reprangdangra par mapang zülu maka asü aser tanü asen putu nung amshiba osettsüset, alima temetetba kecha makai liasü saka parnoki ken ka, o ka ta jembia asen oshi aser sobaliba meraketetji mesamadaktsüi tebuji par chir dang ashi aser par chiri semchir dang ashi, ta tepang o agi belentepa tsürabur nungi chirnur dang sayubentsütepa sobalibaa aruba ajanga asen Ao oshi aser sobaliba mesamadaktsüi kanga dang meraketa tanü tashi bener arutsüogo. Sürapang, tanü asen tsüraburtemia akhi asen tsüraburtemi inyakba ama ner kibong nung aser chirnurtem den pei oshi sayua jembiba aser sobalibatem angazükdaktsüba nung shilem agir asü magir? ta tsürabur ajak dangi tasüngdangba tulu bener arutsür. Kechiaser kechi kin südir süaka oshi kaji tetsü oshi/tetsü meli (Mother tongue) ta dang ajar, anungji ibaji tsürabur ka nungi dang tenzüker aser ashiko tia makara tsürabur ka nungi dang tempangtsü, kechiba süra tsürabur shibai kibong nung aser chirnur den pei oshi mejembilir aser mesayulir iba tetsü mesüra tebu dakji iba oshiji tempanga samadoktsü tia ajurutsü anasa lir. Süra Ao oshi merenlokbaji, chirnuri pei oshi mashibaji aser Ao oshi samabaji shiba ajanga asütsü? Ibai tanü tsüraburtemi kanga dang aroka shisadanga pei shilem inyaktsü mapang tongja tongogo.

Akhi putu mapang Ao oshi zülu maka liasü, saka akhi missionarytemi (Dr. E.W Clark mapang) 1893 küm January 14 - 22 tashi American Baptist Missionary Union (ABMU) conference Tura nung alidang lemtepsüba ama asen oshi zülu maka nungji Roman zülu ojang tajung asen oshi den apet amshitsü bener arutsü aser ibaji Tsüngrem tenzükertem aser Aor lenirtemi mangdang tulu yur mapang aser tensa balala nung belentepa khuret bena Ao oshi zülu renlokdaktsüyonga bener aruba tanübo Ao Senden Literature Board (ASLB) ajanga tongti shilem agia Arangtet tatidang tenzüka Ao oshi tali moluteta terenlok jenti bener arutsüba tanü Aori ngudaki. Saka ya metetdi: tanü tsüraburtemi pei shilem meinyakra item ajakji amajok kümadoktsüsa shibai metet. Kechiaser oshi kaji angazüka metet nung dang zülur aser benschia aoer.

Anungji tsüraburtemi ano tali temulung agüja pei oshi aser chirnur meima kilung nung pei mapa timi inyaktsü kanga dang tongtibang lir ta angatetdi. Aser lanurtemia tanü iba temeyoktep lima ka nung alidang na shiba, kechi kin tejangja meteta tangar den lirumedema litettsü asoshi tsürabur den asüngdangtepa pei oshi wazüka yua pei sobaliba benschia aotsü tanü lanur ajak shilem tulu lir ta metetdi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Yirusalem nung rara ajanga Khristan lenirtem tebilemstü akar



May 10, 2021 nü Yirusalem nung aliba Al-Aqsa Mosque kima Palestine nunger longkak aitertemi Israel police den raraba mapang tangokba noksa nung angur.

May 11, 2021: Tang Yirusalem yimti nung rara tulu adoka rara tamajungba akümba atema Yirusalem nung Khristan lenirtemi tebilemstü akaba lemsatap.

May 10, 2021 nü Yirusalem nung aliba Al-Aqsa Mosque kima Israel police den raraba mapang nung Palestine nunger 331 tashi yiruogo.

May 10 nü Arogo lenirtemi sangdong ka ajanga, "Tawa East Jerusalem nung rara tulu adokba atema onok jashir aser tebilemstü akar. Al-Aqsa Mosque nung süaka mesüra Sheikh Jarrah nung süaka Jerusalem nüburtem akhümket anema inyaker aser Tesünep Yimti ta züingshiba Jerusalem tenüng menüktsür," ta metetdaksü.

Sheikh Jarrah ya East Jerusalem nung kiyong ka lir.

Anepdang Israel nungeri Jerusalem Day amongtsü atema renemba mapang nung Palestine nunger longkak aitertem aser police na tsüngda rara tenzük, aser iba rara nung Israel police-a 21 tashi yiruogo, ta osang ka ajanga metetdaksü.

1968 küm Jerusalem aser Palestine nunger tanaben

longjemba nüngtem nung Israel nungeri Jerusalem Day ya amonger.

Police-i ashiba agi, Palestine nungeri police post ka amaktsü meranga long onloktsüba agi police-i tashiyim amshitsüsa aküm.

Al-Aqsa Mosque compound nung Palestine nungeri longkak aita police anema inyak. Iba tesem ya Muslim nungeri dang masü saka Yihuda nungeria temeshi tesem ka ama züingshir. Yihuda nungeribo iba tesem dang Temple Mount ta ajar, kechiyong iba tesem nungji Laishiba nung aliba Yihuda nunger tekülem ki ana liasü.

"Jerusalem ya Temeshi Yimti lir, anungji Temeshi yimti Yirusalem nung tesünep alitsü atema telok ajaki inyaktsüla. Right wing teloktemi pusema tang tensa tamajungba akümba ajanga Jerusalem aser temeket nung tensa ano tamajungba akümstüsa lir," ta Khristan lenirtemisa metetdaksü.

May 10 nüsa Jerusalem nung Latin Arogoi tang rara adokba atema sashia aitsüogo. Arogoi sangdong ka ajanga, "Tamangertem anema tashiyim amshibaji temeshi tesemi aotsü

aser sademsadema külemstü temeden anema inyakba lir. Sheikh Jarrah nung Palestine nungeri pei kidang nungi kangshia ainshidaktsüba jia tagizükttela masü aser ibaji meimchir temeden anema lir," ta metetdaksü.

"Iba yimti ya 'Tsüngrem ka dang lir' ta amangba yimsü asem indang yimti lir. Iba yimti ya Palestine nunger, Khristantem aser Muslim nunger ajaki tarutsü tia yangertsü atema kasa temeden aliba yimti ka lir," ta parnokisa metetdaksü.

Muslim nunger atema temeshi ita Ramadan mapang Police-i nikongdang Palestine nunger lanurtem Damascus Gate square nung adenshiba nokdangba ajanga April ita nungi Yirusalem nung mepetmesü tenzüka liasü.

Police-i ashiba agi, TikTok videos nung Palestine nungeri iba tesem nung Yihuda nunger temeshi tesemtem raksatsüba noksa prokshiba nung ajemdaker parnoki iba tesem nungji lanurtem adenshitsü memelar. Iba dak alia Sheikh Jarrah kiyong nungi Palestine nunger mindokba ajanga tensa tamajungba kümogo.

ANOGO ABEN TSÜNGREM DEN

Kodang Tsüngremi jembidir, yamaji alir

Yamaji kü bang nungi aoba kü o alitsü: aji amajok nung kü dangi meyipa marutsü, saka aji agi ni aginüba ataloktsütsü aser ni koba asoshi yok iba nung azükarutsü. Isaia 55:11.

Kodang Tsüngremi jembidir, kecha mataloki malir, memelenshir malir. Tetenzük mapang nungi, Tsüngremi jembiba aser kecha makaba nungi alima yanglu. Tsüngremi alima yangludang Pai timi tarensena ka nung (pattern) yanglu: Pai jembi, yamaji liasü, ibaji junga liasü (Lipok 1:3-4). Ibai tarensena Laishiba ajunga jungkai adoktsü; Pai ashiba ama mapa ajak atalok aser Tsüngremi aji junga angu (Fil. 2:13). Tsüngremi tebilemba meshidang Pai jembiba mapa akümstü ta temulungtetba Pai jembi.

Kodangsa Yisui jembi Pai jembiba ama atalok. Chitemra akettertem Yisu nungi O ka jembibaji taneptsü ta angu (Luke 5:13; 17:14). Nükpokeri Yisu nungi o ka jembibaji angutsü tenük ta angu (Luke 18:42). Yisu nungi atakatem o kaji teraksa ta nütsüngtemi mongu zü nu dong nungi angazük (Mark 11:20). Yisu o nungi temenen puri tatok angur (Yn. 8:11). Lazar shia arudaktsütsü asoshi Yisui kwiben merang? Ken dang (Yn. 11:43). Yisui jembiba o kecha matalok mali.

Yisui ne den jembidang kechi ataloker? Yisui jembiba otem Laishiba nungi azüngdang ne taküm nung temelenshiba kecha makai azünger asü? Yisui Farisitem aitsü kechiaser zülua alibaji metetba ajanga parnok nem taküm agütsütsü ta parnoki amang. Shibai oji jembi paji akatsü melen parnoki o akaba nung temulung süa liasü (Yn. 5:39). Tsüngrem nungi o kaji ne taküm nung koda tashi tait lir! Nai Laishiba azüngdang aser sarasadem dang, Tsüngremi ne taküm asoshi kechi mulung angang.

Turkey nungeri bomb amshia Iraq nung Khristan yim ana amak

Washington D.C, May 11 (Agencies): May 08, 2021 nü Turkey nungeri anünglen nungi bomb amshia amakba ajanga Iraq nung Dohuk province kübok Khristan yim ana nungi Khristantem jenshiogo, ta International Christian Concern (ICC) osang ajanga metetdaksü.

May 3 nü Kesta yimtsüng nungi Khristan ajak jenshia anasa aliba Chalke yimdak jenok saka May 8 nüa Turkey nungeri Chalke yim amakba ajanga nisung ka dak alaka ajak jenshiogo.

Turkey nungeri military base amenoktsü nükjidong nung April 23 nungi tenzüka anünglen nungi bomb amshia Iraq nung Khristan yimtsüngtem amaker.

Akhidang Turkey nung Ottoman yimli mapang

Khristantem jenti tepsetba mapang ka nung tang parnoki Khristan yimtsüngtem amaker.

Osang angazükba agi, Turkey linükisa iba tesem nung chemical raraba hadir asemben tashi bener aruogo. Turkey ketdangsertemi ashiba agi parnoki Iraq arrtsülen PKK kiralongrar telok anema operation aoer, ajisüaka Khristantem ang kanga takoksa ngur.

Chalke yimdak Khristan kati dang yim toktsür aotsü memelung; osangbener den jembidang pai, "Ni ozü ki toktsür maotsü, ni asüyonga kecha masü. Bomb maneni yokyonga ni ozü kidang dang mejanger," ta ashi.

Tamalen ICC-i iba tesem nung alirtem den metetpelaba mapang nung yimdaklirtemi,

"Yangi PKK züngsemtem aliba agi Turkey linüki mapang shia timtem agütsür. Item yimtsüng nung alirtemi Turkey linüki koba tesem amaktsüar memetet. Anungji onok yarir mali aser onok koloni aotsüar memetet," ta metetdakja liasü.

ICC indang report "Turkey: Challenges Facing Christians 2016-2020" nung Turkey nunger sepaitemi litsü ulushitsü merangba ajanga Khristantem takoksa kanga anguba indang shia lir.

Turkey nunger sepaitemi kiralongrartem anema operation aoba inyakyim ya alima linüktemi ashishir, kechiyong parnoki PKK pur maliba yimtsüngtem amakdang civilian aika asür.

"Iraq nung Khristan nütsüng timbaka Assyria nunger lir, aser

parnok timbaka akhidang Ottoman yimli mapang jena arurtem lir. Iraq nungsa Islamic State kiralongrartem merenba mapang nung Khristantem kanga akoksaogo. Akhidang nungi Khristantem timtem ajangshia aruba ajanga parnok taküm libalir kanga kongshio. Tang tesüsa Turkey-PKK tsüngda rara ajanga Khristantem kanga timtemer," ta ICC report nung shia lir.

2014-2017 kümtem nung IS kiralongrartem Iraq nung timtem agütsüba sülen Iraq nung Khristantem tang tanaben asentenshir taküm yangertsü merangdar. Tang tashi Khristan kibong aika linüki meyipa maru.

Iba ama tensa mapang ka nung Turkey-i PKK den ceasefire tezüngzüktep tembangba sülen tang Iraq nung

military operations aoba ajanga Khristantem timtemer. Tanübo region nung Turkey ya tashi tulu aliba linük ka kümogo aser parnoki kidanger linüktem nung tamangba yimsü nung ajemdaker kin aika anema inyaker.

ICC Regional Manager, Claire Evans-i, "Iraq nung Khristantem maneni jenshiba osang angashia onok mepelar. Parnok küm aika timtema arur aser iba ya metembanger. Turkey nunger sepaitemi linük security tenüng nung ajemdaker Iraq nung tashi amshir. Turkey-i civilian tem anema inyakba ya International ozüng aser meimchir temeden anema lir.

Iraq nung Khristantem kümzüktsü atema iba tebilemstü onük asoshi inyaktsüla," ta metetdaksü.

OLONG PAITEP # 5809

1		2		3		4	5			
				6						7
		8								
9				10		11				
			12					13		
						14				
16						17				

- | | | | |
|----------------------------|-------|--------------------------------|-------|
| TIPLÉN | | LANGTSÜNGLEN | |
| 1. Nisung jenti | - (5) | 1. Tenük telong | - (9) |
| 4. Tsük rudenba | - (5) | 2. Committee dang ajar | - (5) |
| 6. Temzüng tesashi | - (5) | 3. Yagi ki okdoker | - (7) |
| 8. S_ _ _ i | - (3) | 5. Yim lenmang | - (5) |
| 9. Nisung rongnung telemsa | - (3) | 7. Temoatsü keter meyipa aruba | - (9) |
| 10. Anogoshi | - (4) | 11. Kanga junga menemba | - (7) |
| 12. Ajanga aor | - (4) | 12. Kenyongi majinü | - (5) |
| 13. Tsük rizüngdak | - (3) | 13. Rong kanga tulu | - (5) |
| 14. Tebang nungi adokba | - (3) | | |
| 16. Süngdong tatembangtiba | - (5) | | |
| 17. Meputep | - (5) | | |

OLONG PAITEP # 5808 TELANGZÜBA

- | | | | |
|---------------------------------|--|--|--|
| TIPLÉN : | | LANGTSÜNGLEN : | |
| 3. Tamachi, 6. Nüngshi, 7. Ana, | | 1. Pongzü, 2. Nüngdak, 3. Tasen, 4. Mei, | |
| 8. Rata, 11. Aket, 14. Apu, | | 5. Ibai, 9. Temenen, 10. Onsara, | |
| 15. Tabensa, 16. Tsükten. | | 12. Aiben, 13. Mait, 15. Tatidang. | |



ALOKBAR KIBONG NUNG :

Warakla : Darling, ana kibong kümer küm ter ajungba anniversary nungji nai ni kongi anir aotsü pilemdar?

Alokba : Africa nung min tuluba kati anir aotsü pilemdarko.

Warakla : Oh thank you, süra küm metsür pungu anniversary nungji koda?

Alokba : Idangji ni na tani arulaba.

Warakla : Oh Alokba!

Lilir ; WhatsApp

TANÜBO NAI LANGZÜANG

Q. Mark Selby ya _____ nunger lir.

A. India B. British C. China D. USA

(Taruba adok nung onoki langzüksü)

YASHI ADOK TELANGZÜBA : China

AO OSHI ANGAZÜKDAK:
TANÜ ANGAZÜKTSÜBA OJANG



Ila
(v) ajema (tilaba) kümdaktsüba (reduce)
* Moaba indang tula tulu asüba agi **ila**.

Ilok
(v) Itaka ayu (hang up)
Pai pa yangku jara nung **ilok**.

NAI-A YA METETTER MA?



2010 küm America tsür actress Sandra Bullock-i 'The Blind Side' atema 'Academy Award for Best Actress' aser "All About Steve" atema Golden Raspberry Awards nung 'Worst Actress Award' angu. Iba den külemi "All About Steve" atema laisa actor Bradley Cooper den 'Worst On-Screen Couple' award agizüka lir.

SUDOKU # 5852 TELANGZÜBA # 5851

		6	9	2	3				7	2	9	5	1	6	4	8	3
		2		6	1	3	4	5	6	1	4	7	8	3	9	5	2
	1		4		5	2		6	3	5	8	4	2	9	6	1	7
	3						8		4	6	5	8	3	1	7	2	9
7	4		5	6					1	9	3	2	7	5	8	4	6
								9	8	7	2	6	9	4	5	3	1
	6		8	4		7	2		2	8	6	1	4	7	3	9	5
2	8	9	6		7	4		1	5	3	1	9	6	8	2	7	4
	7	4	2		9		6	8	9	4	7	3	5	2	1	6	8

OJANG LUTEP # 5394

IPE :

ÜMDANMEKG :

RYU :

ANGTAR :

NGDA :

HIMDAKÜNGSA :

ITSALÜ :

ANOSG :

ÜBAJSANGOKTSI :

OKAMAJ :

OJANG LUTEP TELANGZÜBA # 5394

TAJUNGLANI MASÜ TAMAJUNGLANI BILEMA JEMBITETER TELOK RONGNUNG TIA MAKAI DENSEM

TAN HOPTA ATEMA - KOMA SÜLA ?

Q. Asen lima nung Covid-19 agi shirangertem anepalutsü pur doctor aser nursetem agi meperi aküm nunga koma süla ?



Lucknow nung auto union-i COVID-19 agi shirangertem atema Auto Ambulance Service tenzükogo.

Covid-19: India nung anonisung lakh 3.29 dak potetogo

New Delhi, Monupii/May 11 (Agencies): India nung anogo 14 tsüingda Mongolbarnü nisung ishiba dak Covid-19 tashidak potetogo, saka maneni lakh asem dakbo tema lir, ta Union health ministry sangdong ka ajanga metetdaksü.

Taoba ghonda 24 tsüingda linük nung nisung 3,29,942 dak Covid-19 tashidak potetogo aser ajak senteper nisung 2,29,92,517 jungogo.

Tang tashi nung India nung May 1 nü nisung timba dak tashidak poteta lir. Iba anogo nisung lakh 4 tema dak tashidak poteta liasü.

Kasa mapang nung taoba ghonda 24 tsüingda tashidak agi nisung 3,876 asüba sülen ajak senteper covid agi nisung 2,49,992 süogo, ta health ministry sangdong ajangsa

metetdaksü. May 3 aser 9 tsüingda India nung nisung 27,000 süogo, koba hopta ka nung linük nung nisung timtiba asüba liasü.

Ita ana tashidak menar tali tali akümba sülen active cases tajemba küma 37,15,221 kümogo kong total infections 16.16 per cent lir aser linük Covid-19 recovery rate 82.75 per cent nung lir.

Tang tashi nung nisung 1,90,27,304 anepogo aser kasa mapang nung case fatality rate 1.09 per cent nung lir.

Indian Council of Medical Research (ICMR)-i ashiba agi, India nung May 10 nü tashi nung sample 30,56,00,187 tendangogo, kong Hombarnü sample 18,50,110 tendangba densema lir.

India-i linük ajunga nung vaccine dose crore 17.27 dak

tema agütsüogo. Sorkari Mongolbarnü ashiba agi, states/UT tem nem Centre-i vaccine crore 18 angati agütsüogo.

States/UT tem ket nung vaccine dose lakh 90 dak tema lir. Iba den bendenloksema taruba anogo asem tsüingda vaccine dose lakh 7 dak tema agütsütsü, ta Union ministry of health-i Mongolbarnü metetdaksü.

India nung August 7 nü Covid-19 tashi menar lakh 20 aden aser iba sülen August 23 nü lakh 30, September 5 nü lakh 40 aser September 16 nü lakh 50 aden.

Iba sülen September 28 nü lakh 60, October 11 nü lakh 70, October 29 nü lakh 80, November 20 nü lakh 90 aser December 19 nü crore ka aden. India nung tashidak menar crore ana May 4 nü adenogo.

Buxar sülen Uttar Pradesh nung tasü mang apong teta adok

New Delhi, Monupii/May 11 (Agencies): Covid agi shiranger asüba asütsü ta temulung melemi bilemba tasü mangtem Bihar kübok Buxar nung Ganga ayongkümbang nung apong teta adokba sülen anogo ka lir Mongolbarnü Uttar Pradesh, Ghazipur district nunga tasü mang kar apong teta adokogo.

Local administration-i ken o bushitsüing dang tenzükogo.

"Tasü mang kong nungi aru aji jangjatsü atema ketdang sürtem tasü mang apong teta adokba tesem nung oa bushitsüing dangdar," ta Ghazipur District Magistrate MP Singh-i ANI dang ashi.

Ganga ayong nung tasü mang apong teta adokba ngua iba tesem nung aliba nüburtem

tsübuteper aser iba ajanga tashidak tali menatepyonga aotsü ta tsü bua bilemer, kechiyong iba tesem nunga wara kanga sashia pokteter lir.

Iba tesem nung alirtemi tasü mang ashiba nungi teshinem adokba indang ashishi aser ketdang sürtemi jenjang tapet magiba atema parnok aija liasü.

(Maneni tapak 9 nung...)



Jabalpur nung City Hospital Director Samarpit Singh Mokha-i glucose aser metsü na aketba Ramdesivir injection taila ayokba sülen pa police temi puogo.

Maharashtra nung Covid 'Black Fungus' agi kongshirtem angati yaritsü

Mumbai, Monupii/May 11 (Agencies): Public Health minister Rajesh Tope-i, Maharashtra state sorkari, 'black fungus' mesera mucormycosis tashidak agi kongshirtem temang anepaluba taa aotsütsü, ta ashi. Maharashtra nung iba tashidak ya Covid-19 tashidak agi tonger temang anepalua alirtem dak poteta arudar.

State sorkari parnok indang medical insurance scheme, 'Mahatma Phule Jan Aarogya Yojana,' ajanga iba taa agütsütsü asateptsü. Kasa mapang nung 'black fungus' tashidak anepalutsü atema amshiba anti-fungal mozü Amphotericin B, koba sen jenjang tasak lir, iba mozü jenjang yaa ajemtsütsü atema inyakteptsü, ta kasa sangdong ajanga metetdaksü.

"Antifungal mozü tongtiba Amphotericin B ya jenjang tasak aser nüburtemi metozüktsü akok. Onoki jenjang asadangtsü aser ajemtsütsü atema telemtetba ka agitsü," ta pai Times of India dang ashi.

Amphotericin B vile tejang ka jenjang sen 5000 nungi 8000 tsüingda lir aser iba mozü ya hopta 4 nungi 12 tashi agitsüla, koba COVID agi tonger temang tajungba küma oya alirtem

atema tasak asütsü. Mucormycosis tashidak ya junga anepalu mesüi toktsüra timtem tului aitsü aser aiben treatment taa angazükba sülen shirangertemi sentoka toktsür. Jalgaon nungi ENT surgeon Dr Sanjeev Jambare-i Times of India dang, "Mucormycosis patient ka anogo shia temang anepaluba taa sen 60,000 nungi 80,000 shi asütsü. Treatment nung sen intoktsüba indang ashidang aikati ayazüka oadoker. Anepalu mesüi toktsüra mucormycosis ajanga timtem tulu bener arutsütsü," ta ashi.

Iba tashidak agi tonger alir 200 rongnung tang tashi nung nisung tibo süogo. COVID agi shiranger shirnok tanga tashidak bendenloka lir, mesera steroids agir alirtem iba tashidak agi asütsü ana nung lir, ta head Directorate of Medical Education and Research (DMER) Dr Lahane-i ashi.

Black fungus symptom tem rongnung tekolak menüba, temang meta shirangba, tenük telung nung tashiba aliba, teni nembangba aser tenük agi tera mongui akümba densema lir.

Mucormycosis tashidak agi atongertem ya mezü ngbuba wave dang nungi tanabuba wave nung timba lir.

Tamil Nadu MLA tem tenangzüktepba agi



Tamil Nadu Chief Minister M K Stalin'er jabaso aser DMK party youth wing secretary Udayanidhi Stalin den party MLA tem, tenangzüktepba sentong agiba sülen senshiba mapang tangokba noksa nung angur.

Chennai, Monupii/May 11 (Agencies): Tamil Nadu nung 16buba legislative assembly atema tawa shimba MLA tem Mongolbarnü tenangzüktepba agiogo. Taoba chief minister aser All India Anna Dravida Munnetra Kazhagam (AIADMK) lenir Edappadi K. Palaniswami, state assembly nung opposition lenir asütsü asoshi tetokteper shinga meli shimba sülen anogo ka lir MLA tem tenangzüktepba agiogo.

MLA tem tenangzüktepba agiba sentong ya Chennai yimti kübok Kalaivanar Arangam hall nung Mongolbarnü 10 ako nung agia liasü. Speaker aser deputy speaker mapa asoshi election May 12 nü 10 ako nungi tenzüka agitsü. Dravida

Munnetra Kazhagam (DMK)-i Hombarnü menden ana atema parnok indang candidate asütsü asoshi shimba sülen MLA tejen M Appavu, speaker aser K Pitchandi deputy speaker shimtsü imlar, ta PTI sangdong ka ajanga metetdaksü.

DMK tekolakba MK Stalin, May 7 nü Angh Banwarilal Purohit-i state indang chief minister tibuba asütsü asoshi tenangzüktepba agitsüogo.

Tawa tembangba state election nung DMK-i, Congress densema parnok den lokteper aliba party tem den menden 234 nungi 133 akok. AIADMK-i, menden 66 akok aser parnok den lokteper aliba party PMK aser BJP nati menden pongu aser pezü koka liasü.



Kazan, Russia nung aliba school ka nung nisung khasetba sülen, ambulance aser police indang garitem anena aliba noksa ka yangi anur. Kazan yimti nung aliba school ka nung prangbong agi nisung kar khaset aser aika yirutsü, ta osangtem ajanga ashir, koba Mongulbar anepdang ataloka liasü.

Russia nunger kakat reju nung tanur tenet khaset

Kazan, Monupii/May 11 (Agencies): Russia southwest tsütsü Kazan yimti nung school ka nung tanur tenet aser tesayur ka khaset, ta yangji aliba ketdangsurtemi ashi.

Tatarstan republic indang governor, Rustam Minnikhanov-i ashiba agi, Mongulbarnü iba lendong nungya kakatshir tebur pezü aser tetsür asem asü. Kazan ya Tatarstan republic indang yimtiba lir.

Storey pezü atongtepa aliba School Number 175 nung prangbong ola angashiba mapang tanur ana floor asemubaba nungi pongzüka aluba video ka nung nguogo, koba school kimalen nungi tangoka liasü.

Regional health ketdangsurtemi ashiba agi, nisung 21 yirur mozü kidang anepalur aser yangji tanur 18 dena lir. Yirur alirtem rongnung par trok intensive care nung anepaluba mapang lir.

Iba lendong nung nisung asüba ya timba akumtsü akok,

ta osangtem ajanga ashir.

Health ministry osang ka ajanga nisung 11 asü ta ashi, ta mezüngbo Russia nunger news agency kari shia liasü.

Interfax news agency ajanga ashiba agi, prangbong bena alir anati iba school nung injang khaloktsü, saka ano osang kar ajanga ashiba agi, iba lendong ya nisung kati agütsüba lir.

Lanur ka school kima police temi ali nung nenketa aliba noksa kar social media nung nguogo.

"Kiralongrar puogo, pa arishi küm 19 tain lir. Pa tenüng nung prangbong ka züluoka liasü. Pa den alir ano mejangja aser bushisüngdang tenzükogo," ta Minnikhanov-i Mongulbarnü mozüki semdangba sülen ashi.

Iba lendong agütsür ya ano karbo ali asü maliar ano mejangjateter.

Video kar nung emergency service indang garitem school kima anena yur nisungtem ki telungleni asemtepa aoba nguogo.

Iba lendong atalokba sülen Russia Tir Vladimir Putin-i prangbong azüokba temzüng ozüng khen lepa reprangshitsü totuyuba agütsüogo, ta Kremlin-i ashi.

Lendong atalokba nung prangbong amshiba mechi nüburtem ket nung prangbong komala ayutsü melatsü ta asadanga ozüng tasen ka tekeratiba nung yanglutsü atema tiri totuyuba agütsü, ta Kremlin odongtar Dmitry Peskov-i osangbener dang ashi.

Moscow nungi anüdoklen kilometer 800 shi pilar aliba Kazan yimti nung school ajak nung security mera talila benoka lir, ta ketdangsurtemi ashi.

Russia nung kakat reju nung prangbong amshia azüdokshiba ya bulua mataloker.

Iba mesükba lendong tulutiba ya Russia-i amokbanga aliba Crimea nung 2018 küm atalok, kong college azünger kakatshir kati nisung 19 khaset aser pasasa pa khaseta liasü.

Lungbanga aliba Gaza Strip nung Israel-i tayimtsü amshia amaker

Gaza City, Monupii/May 11 (Agencies): Mitkartemi lungbanga aliba Gaza Strip nungi rocket tem khaloktsüba sülen Israel sepaitemi Mongulbarnep asendenshir yangji bomb poklokja liasü.

Hamas temi tzükum nung aliba territory nungi rocket tem khaloktsüba sülen Israel-i tayimtsü amshia aonung sangwa amakdang tanur teku densema Palestine nunger nisung 24 tepseter ghonda ishika lir ano maneni amaker, ta Gaza nung aliba health ministry ajanga ashi.

Occupied East Jerusalem nung aliba Al-Aqsa Mosque kima Palestine nunger anema azüdokshia aruba sülen yangji aliba Israel sepaitem ainshiang, ta Gaza yimsüsür Hamas ajanga takangba agütsüba sülen rocket ya khaloktsü.

Hombarnü agi asemnübuba atonga Israel police temi iba tekülemki kimai aita ngisa agi meyipanger aliba injang, stun grenade aser tear gas tem Palestine nunger tekülem kidang alir dak khaloktsü.

Tesüüba ghonda 24 tsüngda Jerusalem aser occupied West Bank nung Palestine nunger nisung 700 dak tema yirua liasü.

Occupied West Bank kübok

Ramallah yimti nungi osangbener kati ashiba agi, Hamas indang armed wing ajanga Israel tsütsü rocket tulutem khaloktsü.

Minute 30 majungdang rocket 70 dak tema khaloktsü, ta Hamas' armed wing, Ezzedine al-Qasaam Brigades ajanga sangdong ka nung ashi.

Hombarnü nungi tenzüka Gaza Strip nungi Israel tsütsü rocket 300 dak tema khaloktsüogo. Israel-i Al-Aqsa nung talitapong inyak, aser iba atema telangzüba agütsütsü ya tim, ta al-Qasaam Brigades-i shia liasü.

Israel Ato Kilonser Benjamin Netanyahu maneni yimsüsüba menden nung amentsü mechi tensa tamajungba kumdahtsü, ta Palestinian Knesset züngsem aser Balad party lenir Sami Abu Shehadeh-i ashi.

"Yimtenren mepetmesü nungi jenbuttsü mechi, pa tashi mesamatsü aser ato kilonser menden mesamatsü atema pai ajak inyaktsü renema lir," ta Shehadeh-i osangbener dang ashi.

"Yangi kechi ataloker, ya Netanyahu yimsüsüba menden nung maneni amentsü nükjidong nung telemetba agiba lir," ta pai ashi.



COVID-19 tashidak wara agi nisung asüba bilemteta sepaitemi Prague, Czech Republic nung aliba Prague Castle nung temo milen tsüklokba noksa nung angur. Czech Republic nung iba tashidak wara ajanga nisung 30,000 jungnua takum samatsüogo aser Mongulbarnü nungi tenzüka tenokdangba aika salar.

Myanmar University staff meyirejang aika mapa nungi anentsü

Yangon, Monupii/May 11 (Agencies): Military yimsüsüba anema longkaka aitba sülen Myanmar nung junta anema nokdakba academics aser university staff 11,000 dak tema mapa nungi anentsüogo, ta tesayur telok kati Reuters dang ashi.

Coronavirus wara poktetba ajanga küm ka shi lir university lapokba sülen staff o kakatshirtemi Feb. 1 coup anema longkaka aitba sülen tang university tem nung inyakertem mapa nungi anentsü tenzükogo.

"Ni kanga meimba mapa ka toktsütsü sasaa bilemer, saka ochi mashi anema nokdaktsü nemadanga bilemer," ta arishi küm 37 tain university lecturer kati ashi.

"Ozü department-i ni tanü aja. Ni maotsü. Military council tetuyuba sülen manidaktsüla," ta tesayurisa ashi.

United States fellowship nung professor kati ashiba agi,

la dang longkak anemba sangdongang mesera mapa nungi agintsü ta ashi. La inyakba university nung ketdangsurtemi la dang scholar tem ajak bushia kangshia shimdaktsütsü ta ashiba lai Reuters nem metetdaktsü.

Hombarnü tashi nung degree balala agütsüba college aser university tem nung inyaker academic aser staff 11,100 dak tema parnok mapa nungi anentsüogo, ta Myanmar Teachers' Federation ketdangser kati Reuters dang ashi.

2018 küm tashi nung Myanmar nung university aser tanga tertiary education institution tem nung tesayur 26,000 dak tema liasü.

Putu tesadang ka military-i Myanmar yimsü asüba mapang tesayur aser kakatshirtem tejakdang ser parnok yimsüsüba anema aruogo aser tanga lenir Aung San Suu Kyi pua ayuba sülen parnoki anir longkak aita

arudar.

Tesayur aika, medics aser tanga sorkar mapa balala nung inyakertem civil disobedience nung shilem ka ama parnok mapa minyaker aser iba ajanga Myanmar nung inyakym lemtar lir. Military-i sorkar atsüngtokba sülen security forces temi Yangon aser tanga yimtitem nung campus tem atsüngogo.

Osang tejangjaba agitsü atema junta otongdar ka den phone ajanga tongtepratepdangogo saka telangzüba kecha magütsü, ta kasa sangdong ajanga metetdaktsü.

Junta-i achaayangba Global New Light of Myanmar newspaper-i ashiba agi, education system tenzükshitsü atema tesayur aser kakatshirtemi teka amteper inyaktsüla.

Staff 11,000 mapa nungi anentsüba ajanga colleges tem lapokyonga aoba nung koba tashi kongshitsü, iba indang

mejangja saka kakatshirtem aikati class nung madener.

West Yangon Technological University nung student's union-i, mapa nungi anentsür aliba staff 180 indang tenüng sangdongogo, shirnok hero tem ama tushir.

"School-i motetba atema mepelai mali. Junta indang education magiba atema kecha takoksa mali," ta Yangon University of Education nung arishi küm 22 tain kakatshir Hnin-i ashi.

Junta anema opponent temi amenokba National Unity Government nung education minister Zaw Wai Soe-i ashiba agi, kakatshirtemi revolution takok anguba sülenang parnok school-i meyipa arutsü ta ashiba ajanga pa dak kanga kongshio.

Ajisüka kakatshir tanurtem atema jenjang mejangjai lir, kechiyong küm tasen atema registration agi tenzükogo. Nütsünyongsük million 53 aliba

linük nung kakatshir million 10 shi lir.

Longkak aitertemi, "onok military alar ama education mangazükner," ta taoba hopta Mawlamyine nung school ka kikümtong nung zülur tokja liasü, koba Myanmar ajunga nung kakatshirtemi tetshia arudar.

"Otsüla Suu chiokba sülenang onok school-i aotsü," ta taoba hopta Hpakant jila nung kakatshir kati banner ka amer liasü. "kakatshirtem ajak chiokang," ta tanga banner ka nung zülur liasü.

Tang tashi nung nisung 780 tepseter aliba rongnung kakatshirtem aika densema lir aser kasa mapang nung nisung 3,800 pur alirtem rongnunga kakatshirtem aika densema lir, ta Assistance Association for Political Prisoners activist group-i ashi.

Pua alirtem rongnung tesayur 47 densema lir aser tesayur 150 aputsü atema tetuyuba agütsü lir.

Kanga dang tobur junga litetba taküm bilemteter.



MRS. BENDANGJUNGLA PONGENER

09.03.1986 to 05.05.2021

"Lai nisung aika taküm nung kongshi; Ozüi kanga meimla. Onok takümtem nung tesangwa. Onok nüktzü ajanga menürema toksür ogo"

Ozü mokokmin timtem mapang medemertem aser kibongtemi ozü den yaritepba aser yimya balala ajanga onok süneptsüba atema kanga pelar.

Balaka pelaba shisemer:

- * Ao Christian Revial Church Dimapur/ Mokokchung-parnoki sarasadem nung metitemi nungitba atema..
- * Dimapur Ao Baptist Arogo
- * Department of Agriculture, Gon
- * ATMA Mokokchung/KVK Mokokchung
- * Mohicans (Agri batchmates)
- * Doctors/Nurses, Health City Hospital, Guwahati
- * Eden Hospital Dimapur.

*Teti meimer
Kodanga mamatsü
Tatem maka
menungratsü*

Kinungbo, Nori, Peri & Kinungertem

Isuzu Motor India-i 'D-Max' range sayaogo



ama six-speed manual aser V-Cross variant nunga six-speed inoka yanglutsüogo.

BS-VI Isuzu D-Max V-Cross nung feature talisa bi-LED projector headlamps, LED DRLs, LED taillights, 18-inch wheels, programmed environment control, shift-on-fly 4WD drivetrain, cruise control, seven-inch touchscreen infotainment framework ka, double airbags, ABS den EBD, backstopping sensors aser tesülen camera inokja lir.

Ano külen, BS-VI Isuzu D-Max Hi-Lander nung halogen headlamps, dark ORVMs aser steel wheels den wheel cover angutsü. Ajisüaka, temaba variant ama iba gari nung alloy wheels, haze lights, rooftop rails, chrome embeds aser touchscreen infotainment framework dena mali.

Chennai, Monupii/May 11, 2021 (Agencies): India shishilembadak Isuzu Motor India-i BS6-compliant D-Max range sayaba sangdongogo. D-Max garitem sen lakh 16.98 (ex-showroom, Tamil Nadu) nungi tenzüka ayoktsü.

Iba range nung model asem - D-Max Hi-Lander, D-Max V-

Cross Z 2WD AT aser D-Max V-Cross Z Prestige 4WD AT dena lir.

Isuzu D-Max range tasen nung taoba 2.5-litre engine melena 1.9-litre diesel motor inoka yanglutsüogo. Iba unit tasenba engine ajanga 161bhp aser 360Nm torque agütsür. Iba D-Max range nung standard

Buxar sülen Uttar Pradesh nung...

(Tapak 7nungi...)

"Onoki ketdangsürtem nem iba ken o dak sendakba nung osang agütsü, ajisüaka parnoki kecha jenjang magi. Tensa yamai dang ora Coronavirus tashidak agi atongtsü ta tsübua bilemer," ta iba tesem nung alir Akhand-i ANI dang ashi.

Bihar nung tasü mang apongnteta adokba ajanga linük nung Covid tashidak ya kanga mejungi odar ta tsübua bilemer.

Tashidak agi asür kinungertemi tasü mang rongtoktsü atema tesem mongutetba ajanga iba ya atalok asütsü akok, ta ketdangsürtemi bilemer.

Union Minister Gajendra Singh Shekhawat-i Mongolbarnü, iba tatalokba ya kanga dang tia maka tatalokba ka ta shia, ken o dak sendaka aliba state tem dang tangsa tang jenjang tapet agitsü tetuyuba

agütsüogo.

"Bihar kübok Buxar tesem nung Ganga ayong nung tasü mang apongnteta adokba tatalokba ya kanga tia maka. Ganga ayong merektetsü atema Modi sorkar bendanga agütsür lir. Iba tatalokba ya imlaa maliasü. Ken o dak sendaka aliba state temi tangsa tang jenjang tapet agitsüla," ta Shekhawat-i tweet asü.



Office of the
Ao Senden

H.Q: MOKOKCHUNG: NAGALAND
Ph: 0369-2228896/e-mail: aosenden@gmail.com

Date: 11/05/2021

SANGDONGER

Wb. Talitemjen Imchen Dimapur, pai züluba kaket "Ao Oshi Lenikaket" ya Ao Senden Executive Committee March 5, 2004 Pangzüng No. 1 (4) lemtet anema inyakba lir. Anungji iba keno Ao Senden den metembang tashi tanü nungi iba kaket kecha nunga mayoktsü aser nübur shingaia alia mamshitsü tekümdangtsü metetdaksür.

(Signature)
(Chubawati Longchar)
President

(Signature)
(Imtipokyim)
Secretary

'Made in India' - Lava Z2 Max saya

New Delhi, Monupii/May 11, 2021 (Agencies): India indang smartphone yangluba company - Lava-i 'Lava Z2 Max' India nung sayaogo. Iba smartphone nung 7-inch display keta lir.

Lava Z2 Max ya taküm January ita sayaba vanilla Lava Z2 den tatongtep alitsü. Screen tulu dak alaka, iba phone nung 6,000mAh battery ka dena lir aser gaming den content viewing atema battery yagi nungitter. Iba smartphone tesülen, dual camera setup aser video calling atema tejaklen 8-megapixel camera angutsü. Selfie camera ya tejaklen waterdrop-notch nung inoka yanglutsüogo.


Specification tsütsü reprangdangra, Lava Z2 Max nung 7-inch screen den HD+ (720x1,640 pixels) resolution, 258ppi pixel density, 20.5:9 aspect ratio aser Gorilla Glass 3 protection angutsü. Quad-core MediaTek Helio processor den 2GB DDR4X RAM aser 32GB onboard storage ajanga phone maparen achaayangtsür aser memory ulua aginürtemi 256GB tashi atsülanga

amshitetsü.

Iba smartphone yagi dual-SIM card support asür aser operating system ji Android 10 Go alitsü. Tesülen camera nung 13-megapixel primary camera den f/1.85 aperture aser 2-megapixel secondary sensor inoktsüogo. Camera yagi HD quality video tangokteter aser camera app nung mode talisa beauty mode, HDR, night mode, bokeh mode aser tanga aika angutsü.

Maneni, Lava Z2 Max nung Wi-Fi, 4G VoLTE, Bluetooth v5, GPS aser 3.5mm headphone jack dena lir. USB Type-C port ajanga 6,000mAh battery charge sütsür. Company sangdong ka ajanga angazükba agi, iba phone nung ghonda tuku tashi YouTube video reprangteter. Lava Z2 Max ya 2GB RAM den 32GB storage nung angutsü aser iba smartphone jenjang sen 7,799 alitsü.

India nung Lava Z2 Max ya Lava website, Amazon aser Flipkart ajanga angutsü. Kasa mapang, smartphone ya Stroked Blue aser Stroked Cyan sentsü ana nung angutsü.



Mumbai, Monupii/May 11, 2021: Alima ajunga asungba COVID-19 wara anema raratsü atema 'Project Heal India' indang shilem ama, India tesem ajunga nung nungdakba medical osettsüsettem lema agütsüba mapatong nung nungntugu Bollywood actor Anupam Kher-i shilem agiba yangi noksa nung angur.

Zimbabwe-i Test cricket masayatsüla: Ramiz Raja



New Delhi, Monupii/May 11, 2021 (Agencies): Taoba mapang Pakistan cricket team nung asayar, Ramiz Raja-i ashiba agi, Zimbabwe-i mapang tatsüka atema Test cricket nung masü saka ODI asayamung nungang temulung agüja asayatsüla.

Anogo/mapang talanglang agia asayaba Test cricket tsütsü, Africa nung dena aliba Zimbabwe yagi viewership' atema tajangzük kecha magütsüba asadangteta, Raja-i iba tebilemba lemsatöp.

Ramiz Raja-i ashiba agi, Harare nung Pakistan-i 2-0 agi Zimbabwe pur kanga mejungi tsükdaktsüba sülen, tang tashi iba Test series tamakok nungi parnok ano kecha mangazük.

Iba ama tetoktepba maliba series ya kodanga masayatsüla. Yamai dang asayara, Test cricket atema viewership jenjang mejungi akümtsü aser nüburtemi cricket reprangtsü melena tanga saisapong agi melentsü, ta pai ashi.

Hombarnü, Pakistan-i Zimbabwe madak tanabuba Test asayamung innings ka aser run 147 agi akokba sülen, iba asayamung tembanga liasü.

Mezüng Test nunga Babar Azam'er teloki innings ka aser run 116 agi Zimbabwe tsükdakja liasü. Iba tour tetenzüklen, Zimbabwe-i T20I series 2-1 agi tesemdang team - Pakistan makok.

"Iba ama tetoktepba kecha maliba series yabo kodanga masayatsüla. Test cricket ya nisung aikati merepranger aser iba asaya atema terepranger melii akümtsüsa tensa kati arudaki. Team ana tsüngda asayaba saisapong ka nung telok kati dang toktepa mesüra junga asayara, terepranger temi football amala mesüra tanga saisapong agi melentsü. Anogo asem nung Test asaya tembanga ya asayamenü ka ama dang," ta Raja-i pa indang YouTube channel nung metetdaksü.

"Team tajung ka den asayadang, tamakok angubaji masü saka kechi ajanga tamakok angu, ibaji jung junga shisadangtsü nüngdaker. Yimya agi team tajung ka den asayadang, parnok dang nungi asaya yimyatem aser tasa balala angazüksü maongka angur; aser iba jagi tashimait team tem lenmang aisü nung

melenshir. Ajisüaka, iba series nungi Zimbabwe team-i kecha mangazük ama nibo bilemer, kechiyong series tenzükler nungi tatem tashi Pakistan-i parnok kanga dang junga amokbanger asaya. Ano külen, Test series tanabuba nunga Zimbabwe team pur asaya nung temelenshi kecha meliasü," ta Raja-i shisem.

Tesüiba küm ishika nungi Zimbabwe cricket jenjang kanga mejungi kümogo aser senior national team pur asaya yimya ajanga iba sayuogo. ICC Test Rankings nung jenjang 10buba nung alir Zimbabwe team-i 2016 küm nungi top 10 team balala den 5 ben dang asayadanga lir.

"Tang Zimbabwe indang Cricket team jenjang angudang kanga sasar, kechiyong tesüiba küm nung parnok ya tetokteper team tajung ka ama asaya aru. 1992 World Cup asayaba mapang, Zimbabwe team nung 'world-class' asayar asem/pezü tashi liasü, shirnok dak asalentong tajung yanglua asaya takok leni anitsüsa shilem agiogo," ta Raja-i ashi.

"Zimbabwe Cricket inyakyim tsütsü melungi tashi meiti aoba den külemi cricket board nung ochimashi maparen jenti adok. Tesüiba küm 15 -20 tsüngda Zimbabwe Cricket tsütsü item timtem ajangshia aruba ajanga tanü parnok iba jenjang nung lir. Tarutsü anogotem nung parnok junga asayatsü imlaa atar, saka mapang tatsüka atema parnok Tests Cricket masayatsüla aser iba melen ODI asayamung nungang temulung agüja asayatsü nüngdaker," ta Raja-i shisem.

Dhawan captain inyaksü tetemsü : Deep Dasgupta



New Delhi, Monupii/May 11, 2021 (Agencies): Taoba mapang India indang wicketkeeper-batsman Deep Dasgupta-i, July ita Sri Lanka den asayatsü renemba limited-overs series' atema Shikhar Dhawan ya captain tajung ka asütsü ama bilemer, ta ashi.

Captain Virat Kohli aser Rohit Sharma na densema Test cricket nung teti shilem agirtem August aser September nung Test series 5 atema renemshitsü mechi July ita England nung alitsü asünung, India team nung ODI asayar tajungtem anioxtsü imlar.

Sports Today den jembiba mapang, Deep Dasgupta-i ashiba agi, ano külen bowling tsütsü tajangshiba jenti alir Bhuvneshwar Kumar amala asayar ya Sri Lanka nung limited over series atema captain inyaksü candidate tajung ka lir.

June 18 nungi tenzuka asayatsü aliba World Test Championship final aser iba sülen August nungi England den Test series pungo atema taoba hopta BCCI-i India squad atema züngsem 20 sangdongogo.

Iba asayamung ana tsüngda ita ka dak tema India Test squad pur tanga asayamung kecha asayatsü mali, saka Covid-19 wara dak sendakba nung senzüsönongtsü tenokdangba takang aliba ajanga England nungi parnok marui amungtsü.

BCCI president Sourav Ganguly-i, July ita Sri Lanka nung India-i whiie-ball series asayatsü ta osang jangjatsüogo aser iba series nung ODIs 3 aser T20Is asayatsü sentong lir.

Test squad nung Shikhar Dhawan dena mali; kasa mapang Bhuvneshwar Kumar-a temang nung timtem kar aliba ajanga England indang Test Tour atema pa meshim. 2018 küm nungi Kumar-i iba asayamung (Test) nung khen danga shilem agidanga mali.

"Virat Kohli, Rohit Sharma, KL Rahul nung ODI squad nung dena mali. Iba squad nung rongnung Shikhar lir, asünung,

captain atema Shikhar ya nübu tetemjen ka asütsü ama bilemer," ta Dasgupta-i ashi.

"Team anir asayatsü atema captain ji shiba asütsü ta tasüngdangba ka liasü, idangji Shikhar yimdangi aru; ano külen Bhuvneshwar-i asayatetsüsa pa temang agi melara, pa captain atema nübu tajung ka lir," ta pai ashi.

Dasgupta-i, England Tour atema züngsem 20 Test squad nung Bhuvneshwar Kumar maniokba atema aoksatsü madoker. Ajisüaka, cricket asaya arur commentator aser iba asaya tsütsü takotet akümsang Dasgupta-i ashiba agi, squad den külemi Kumar-a Sri Lanka-i otetra, team pur atema iba ya tajangzük tukuka asütsü.

"Aruya aliba England tour atema squad nung fast bowler 6 tashi renema lir. Item asayamung ya Bhuvneshwar atema maongka asütsü, saka pai küm 2 ser tesadangka atema cricket asayadanga mali. Iba den külemi 2018 küm nungi pa temang nung timtem adokba junga taneptsü mengui lir," ta pai ashi.

"Anogo pungo tashi cricket asayatsü atema pa (Kumar) temang agi menanzüksü akok. Bowler ka ama, mapang shia asayara, anogo nung nai over 20 tashibo ontettsüla aser taruba anogo nunga yamaji asayatsüla. Ibaji inyaktetsü asoshi pa dak tuluka keta lir," ya Dasgupta-i ashi.

"Ranji Trophy asayamung nunga pai Test asaya nung asayadanga mali. Sri Lanka series nung Bhuvneshwar ama asayar ka aniokra, team atema kanga tajangzük asütsü. Team nung asayar tain ka dena shilem agibaji tongtibang aser aji kanga dang nüngdakba ka lir," ta Dasgupta-i shisem.

Hopta ka tashi quarantine nung amungba sülen, June tetenzüklen India Test squad England-i ayamesoa aotsü sentong lir asünung, Sri Lanka nung 'limited-overs series' atema BCCI-i yakta ODI squad sangdongtsü.

Anand-i exhibition match nung shilem agitsü

New Delhi, Monupii/May 11, 2021 (Agencies): Chess maestro Viswanathan Anand den külemi Koneru Humpy, Dronavalli Harika, Nihal Sarin aser Praggnanandhaa Rameshbabu nungeri India nung COVID-19 relief maparen pusema, Brehostibarnü Chess.com nung exhibition match asayatsü.

Chess.com sangdong ajanga angazükba agi, user ka, shibai exhibition match nung shilem aginür, parnokji 2000 kübok Chess.com blitz mesüra FIDE standard rating alitsüla aser taoba mapang world championship - Anand asayadaksütsü atema dollar 150 mesüra registration mapang parnok dollar 25 tenla agütsütsü nüngdaker.

"Aier asangur mesüra tantsü tambu ka danga iba tashidak agi memenebpa mali ta bilemer. Iba sentong nung ni shilem agitsü mulunga lir aser iba asaya



ajanga senotsü bendentsü imlar," ta Twitter ajanga Anand-i lemsatöp.

Chess.com-isa iba asaya sayuba mapang tenla agütsüba tem agizüksü aser dollar 10,000 tashi bendentsü nükjidong lir. Chess.com/tv nung Danny Rensch aser Samay Raina nati iba Livestream ketdang asütsü.

"Tang India nung COVID-19 wara ajanga nüburtem rokongba asenok ajaki ngua aser meteta lir. Iba den külemi asenok ajak iba tensa ajanga

tetsükdaksü ajurur. India nung COVID-19 relief maparen nung asenok ajaki nungita yaridi," ta Chess.com India ajanga video ka nung Anand-i iba olen lemsatopa liasü.

"Nai India nung grandmaster takotet kar den asayatsü akok aser Chess.com ajanga nai agütsüba tenla agizüksü. Anüngji, Brehostibar aonung 7:30 ako meta Checkmate COVID nung mulungsoa shilem agitsü asoshi tenüng agüjangma," ta Anand-i shisem.

BILEM DANGANG

"Pei kümdangshiba ajanga tangara lendong nungi jenbor."